

Hospital Shah Alam tertangguh, pesakit terpaksa 'merantau' jauh
The Malaysian Insider
March 6, 2015
Oleh Yasmin Ramlan

Sejak bulan lepas, kira-kira 300 pesakit denggi dari Hospital Tengku Ampuan Rahimah (HTAR), Klang terpaksa dipindahkan ke Hospital Banting kerana tempat serta kemudahan yang terhad di hospital yang terletak di Bandar Diraja Selangor itu.

Antaranya termasuk Marsya Fakhirah Fahlavei, 20, dan Nurhusna Jusoh, 21, kedua-duanya dari Shah Alam.

Mereka terpaksa ditempatkan jauh dari kediaman mereka memandangkan tiada hospital kerajaan yang berdekatan di bandaraya Shah Alam.

Hospital Shah Alam (HSA) yang dibina sejak 2007, mengikut jadual asal siap pada 2011, tetapi menurut Menteri Kesihatan Datuk Seri Dr S Subramaniam tahun lepas, ia dijangka beroperasi pertengahan tahun ini.

Marsya berkata, setibanya di HTAR, kira-kira 12km dari kediamannya, beliau hanya ditempatkan di bilik pemerhatian.

Beliau tidak dirawat di sana tetapi kemudiannya terus dipindahkan ke Hospital Banting, kira-kira 45km dari Shah Alam.

"Saya memang tahu HTAR penuh. Tapi, daripada tidak dirawat, lebih baik dipindahkan saja, walaupun jarak dari rumah agak jauh," katanya yang mengakui keadaan di Hospital Banting lebih selesa daripada segi kemudahan berbanding HTAR yang sentiasa padat.

Masalahnya ialah, jaraknya yang agak jauh menyebabkan keluarganya tidak dapat datang melawatnya di situ, kata Marsya.

Sementara itu, Nurhusna berkata beliau juga lebih selesa di Hospital Banting dibandingkan dengan HTAR.

"Memang jauh dari rumah, dan wad yang saya ditempatkan sekarang bercampur antara pesakit lelaki dan perempuan, tetapi di sini lebih selesa dan tidak ramai seperti di HTAR," katanya.

Menurut seorang petugas di wad itu, pesakit denggi dari HTAR hanya ditempatkan dalam satu wad iaitu wad 3 bagi pesakit lelaki.

"Setiap hari akan ada kira-kira 5 pesakit denggi dari HTAR yang dipindahkan ke sini.

"Tidak kira sama ada keadaan mereka kritikal ataupun tidak. Dan 2 pesakit akan dibenarkan keluar setiap hari," katanya.

Exco Kesihatan, Kebajikan, Hal Ehwal Wanita Dan Keluarga Selangor Dr Daroyah Alwi berkata HTAR menerima kira-kira 100 pesakit denggi setiap hari dan kebanyakan daripada mereka terpaksa dipindahkan ke Hospital Banting dan Hospital Sungai Buloh.

Beliau yang merupakan seorang doktor gigi berkata, keadaan itu berlaku disebabkan kepadatan pesakit di HTAR dan kemudahan yang terhad.

"HTAR hanya menyediakan 180 katil untuk pesakit denggi. Tetapi apabila pesakit denggi ini lebih ramai daripada katil sedia ada, terpaksa dipindahkan ke hospital berdekatan," katanya ketika dihubungi The Malaysian Insider.

Beliau berkata pesakit denggi terpaksa dipindahkan berdasarkan kemasukan mereka setiap hari.

"Pesakit denggi biasanya tinggal di hospital tiga hingga empat hari. Dan dalam satu hari mungkin ada 100 pesakit denggi.

"Tetapi mereka hanya boleh dimasukkan ke wad apabila ada pesakit yang sebelum itu keluar.

"Itu yang menyebabkan tidak cukup katil untuk disediakan bagi keseluruhan pesakit denggi yang datang setiap hari," katanya.

Beliau berkata salah satu faktor utama perkara itu berlaku ialah penangguhan operasi HSA.

"Daripada segi bangunannya kelihatan siap, cuma persoalannya, bila ia akan beroperasi?

"Sebab, ia sangat penting. Yang kita ada, HTAR, semua pesakit berkumpul, kebanyakannya dari kawasan Klang, daerah Petaling dan Kuala Selangor.

"Malah pesakit dari Hospital Tanjong Karang juga terpaksa dirujuk ke HTAR," katanya yang juga ahli Dewan Undangan Negeri Sementa dari PKR.

Menurut statistik denggi terkini Selangor, pada Februari, daerah Petaling mencatatkan kes tertinggi dengan 5,967 kes melibatkan 16 kematian, diikuti Hulu Langat (2,222 kes, 7 kematian), Klang (1,824 kes, tiada kematian) dan Gombak (1,238 kes, 1 kematian).

Daroyah ketika dihubungi menggesa Kementerian Kesihatan menyegerakan operasi HSA.

"Saya minta supaya menteri kesihatan menjawab bila Hospital Shah Alam ini akan beroperasi.

"Ramai pesakit denggi dari Shah Alam dihantar ke HTAR. Jadi kita minta supaya ia

disegerakan," katanya.

Sementara itu, Ahli Parlimen Shah Alam Khalid Samad berkata, HSA sebenarnya dijangka beroperasi pada bulan ini, namun kepastiannya masih belum diketahui.

Ditanya sama ada beliau ada membuat tinjauan di HSA itu, beliau menjawab: "Saya nak pergi tengok pun dia (menteri kerja raya) tidak jawab. Saya tunggu dia beri tarikh.

"Saya hanya minta nak buat lawatan, dia kata akan aturkan tetapi masih tiada apa," kata pemimpin PAS itu yang mengatakan beliau memohon membuat lawatan ke tapak HSA sejak tahun lepas.

Khalid turut bercadang mengusulkan isu penangguhan hospital tersebut pada sidang Parlimen yang akan datang walaupun ia sudah dibangkitkan pada tahun lepas.

"Kalau diikutkan hitam putihnya, dalam sesi Parlimen yang lepas, dia (Kementerian Kesihatan) kata Mac 2015.

"Tetapi mengikut maklumat tidak rasmi, ia tidak boleh disiapkan pada Mac tetapi mungkin Jun," katanya.

Pembinaan HSA di Seksyen 7, Shah Alam itu bermula pada 15 November, 2007 tetapi gagal disiapkan mengikut jadual pada 2011, menjurus kepada kontraktor baharu dilantik pada tahun sama untuk menyiapkannya.

Subramaniam berkata pada Oktober tahun lepas, pihaknya ketika itu sedang giat menjalankan proses pentauliahan peralatan dan kelengkapan perubatan bagi HSA.

Katanya, 2,300 bilik dan ruang di kompleks kesihatan yang menelan belanja RM410 juta itu memerlukan pemeriksaan teliti termasuk proses percubaan peralatan bagi memastikan ia berfungsi dengan baik. – 6 Mac, 2015.

Copyright © 2015 Edge Insider Sdn Bhd

Source:

<http://www.themalaysianinsider.com/bahasa/article/hospital-shah-alam-tertanggung-h-pesakit-terpaksa-merantau-jauh-kata-exco-sela>